

ХАНТЫ ЯСАҢ

20 июля 2017 года

www.khanty-yasang.ru

№ 14 (3482)

Основана 1 ноября 1957 года

Ванщавят кэрт 235 оҟ постас



В.Тарлина кигуҟ хуҟ

Там ханты неңән Валентина па Нелли Кондин рэт эвэлт
вөлдәңн. Хуҟ велпәсләты вер дын яма вөлдәң.

Там
номерән
дүңтаты:

3

Айлат ёх
вухн
сухуптәдыт

4-6

«Ханты ясаң»
газетая
хәншум
хуятат олдәңн

7

Округ кәща
нем эвәлт
ай хопн
кәссәт

10

Увас мұва
емәңхәтла
яңхсәт

8-9

12-13

Юрий Вәлла
музей хот
олдәңн

Манстәр район 80 ода йис

Вещ тыдәш 4-мит хәтлән Октябрьской район (катра пурайн Микояновской) 80 ода постәсы. Ши вулаң емәңхәтл вўраңан щәта вәлты хәннехуятәта округ кәщә не Наталья Комарова вўща ясаң лупәс. Ши хәтлән лўв Манстәр района яңхәс.

Лўв район кәщә ех пида ши хәтлән пўншум «Сквер моей мечты» тәхи нух вантәс. Район кәщә не Анна Куташова па округ дума депутат хә Леонид Михалко пүтәрсәңән, муй ширн

тәм тәхи пўншты олаңән нумәс юхтәс. Мет олңәлн щимәщ тәхи пўншты олаңән Октябрьской вош әшкола нявремәт пүтәртты олңитсәт. Щәлдә ши вера оса тәхет ех, депутатәт, кәщә

хуятәт па әл хәннехуятәт пилташсәт.

Ши юпийн етнхот ванлтәсы, хута район якты-ариты тәхет яксәт па арисәт.

Округ кәщә не Наталья Комарова әктәшум мира ям, хошум вўща ясаң лупәс. Ар ол рәпитум еха вән пәмәщипа ясаң пүтәртәс.

— Октябрьской район округевн катра пурайн,

муй па интәм па елды вәлты артән вулаңа вәл. Октябрьской районән йис пурайн Кодской княжества тәхи вәс. Ши тәхи мет сыры Россия мўва питәс. XVI-мит йисн тәм район тәхийн мет олаң пўш юхтум рўщәт кәртләл верты питсәт, — лупәс кәщә не.

Ши емәңхәтлән мет яма па тәса рәпитты хуятәт мойлупсәт еша павәтсәт.

Хәнты ясаңа тулмаштәс Надежда ИЛЬИНА

Емвошн вәнт кәрт пўншсы

Емвошн увәс мўва мойна юхтыйлты хәннехуятәт пәта «Вәнт кәрт» немпи тәхи пўншсы. Тәм кәрт Даңал ас хонәңән версы. Ши вер Югра мўв правительства миюм грант вухәт унтасн тывәс.

Кәрт кўтупн «Похатур ики» хот омәссы, хута мойң хуятәт әрәщты па епләң детутәт деты шир тәйләт.

«Вәнт кәрт» ол хўват рәпитты пилт. Лўңән тәта рыпакләты, ай хопн яңхты, певәлты питләт. Ищиты тәта немәсыя хотәт омәссыит, хута юхтум мир рўтьщәты шир тәйләт. Ши тумпи кәртән арсыр әмәщ вәерәт ләщәтдйит, хута щив хәншаньшум хуятәт шуши мир пурмәсәт верты питләт. Дыв увәс ех вәлупсы па йис, вәдпәсләты верәт олаңән уша верләт.

Тәдн па тәта Йилуп ол постәты хәтләт пурайн Ищьки ики хот ләщәтды. Ши тәхи пўншум община кәщә хә Олег Шатин лупәс: «Тәта иса мойң хуятәт пәта кәрт тәхи ләщәтсы. Ләдн тыв юхтыйлты ех яма па тўнщирәна ат рўтьщәсәт. Ма нәмәслум, хути щимәщ кәрт мўң вошевн шеңк мосл».

Югра мўв промышленность департаментән туризм әхтыйн рә-



Хәнты як ванлтәләт

М. Вах вўюм хур

питты тәхи кәщә ләңкәр хә Дмитрий Саватеев пүтәртәс, хути тәм тәхи мўвева юхтыйлты мойң ех пәта федеральной ширн нух хәншды.

Ма нәмәслум, хути ям ши, щимәщ тәхет

пўншты питсыит. Па мўвәт эвәлт тыв юхәтты мойң хуятәт мўң мўвев па тәта вәлты шуши мир олаңән аршәк вәты питләт. Щит мўң мирев пәта вән унтас тәл.

Вәндәт па айлат ех вәйтантыйлсәт

Лыпәт енумты тыдәшн 26-29-мит хәтлән Емвошн округевн айлат хуятәт пәта «Югра молодёжная» немпи мирхот верәнтсы. Па ши вер вўраңән айлат ех Россия па Югра мўв айкеләт кәншты па хәншты тәхет кәщә хуятәт пида вәйтантыйлсәт.

Мирхот мәнум пурайн нявремәт Москва хон вошев эвәлт «Русский репортёр» журнал кәщә Виталий Лейбин, арсыр айкел хәншты непекәт есәлты «Эксперт» немпи тәхийн рәпитты не Ольга Андреева юхтыйлсәңән. Югра Общественной палата кәщә ләңкәр не Ольга Сидорова «Социальное

кино, социальное предпринимательство» немпи семинар тәс.

Ищиты ши хәтләт мәр айлат хуятәт округевн айкеләт хәншты тәхет кәщә ех пида вәйтантыйлсәт. Щит, «Хәнты ясаң» па «Луима сәрипос» газетайңән ух не Раиса Решетникова, ар ол округевн рәпитты айкеләт хәншты ими

Альбина Глухих, Емвошн информационной центр кәщә ики Анатолий Корнеев па «Новости Югры» газета кәщә хә Владимир Меркушев.

Дыв газетайләл олаңән пүтәртсәт, муй ям ут вәл рәпәгаел әхтыйн, муйсәр суртәт вәлдәт. В. Меркушев пүтәртәс, муй ширн яма хәншты мосл. А. Глухих сыры оләт олаңән ясаң тәс. «Сыры мўң хәннехуятәт олаңән ар айкел хәншсўв, интәм па мултыкем политика па кәщә ех рәпәта олаңән хәнш-

дәт», — лупәс Альбина Глухих.

Р. Решетникова хәнты па вухәл газетайңән олаңән пүтәртәс. Лўв лупәс, хути дыв ай кәртәта яңхләт па нявремәт айкеләт хәншты вәндәтләт, ләдн, хәнты айлат ех дыв хушеда рәпитты ат юхәтсәт.

Ши юпийн эвет-пүхәт кашәң хуят эвәлт яң вер олаңән иньщәсәт.

Мария ВАХ, ЮГУ хуши вәндтыйлты эви Хәнты ясаңа тулмаштәс Надежда МОЛДАНОВА

Нявремат пата яң од верды

Ёмвош округ кәща не Наталья Комарова Югорск вошн «День семьи, любви и верности» хәтл вўраңан Югра хоттел ёх мирхот верәнтәс. Ши мирхот видеоконференция ширн вәс. Ияха әктәшум хуятәт путәртсәт, муйсәр верәт дыв ләщәтләт «Десятилетие детства» вер әхтыйн, мәта ут Россия мўв президент хә Владимир Путин 2018-мит од вўш эвәлт пўншты нумәс верәс.

«Тәм поступсы Ас нопәтты тыдәшн Россия мўвев вудаң кәща хәйн хәншсы. Тәм непек президент майской Указәт елды тәл, мәта утәт мўң мўвев пата вән унтас вердәт, социально-экономической верәт нух алумдәт, муй мўң елды вәлды нявремәта хәйлүв, — лупәс Н. Комарова. — Мәнум од Югра мўвн «Нявремат ода» вәс па щит нәтл елды «Нявремат яң од» әхтыйн рәпитты».

Нижневартовск вош эвәлт Югра семейной Совета дүңты не В. Матвиенок нумәс тәс, хуты ащет пида рәпитты мосл, «Аши хәтл» постәты.

Здравоохранения департамент оса тәхийн рәпитты хә В. Каданцев лупәс, хуты округевн няврем тайтыйн әңкет хутәш ән йилдәт, нявремәт күтн па щимәшч вериса щимла йис. Лүв елды путәртәс, муй па верты мосл лекщитты верәт әхтыйн, дәдн мир тәдәна ат вәсәт.



Интернет эвәлт вўюм хур

Па ши тумпи мирхотн вәлум хәннехуятәт арсыр әмәшч верәт олаңән путәртсәт, муй ши яң од мәр ям па мосты ут ләщәтты рәхл.

Н. Комарова ши путрәт хәләнтмал юпийн щиты лупәс: «Нын арсыр мосты яснәт путәртсәты, мўң муй мосл щит верты питлүв. Шеңк ям, хуты мўң округевн щимәшч апрәң па каркам хуятәт вәлдәт. Итәх верәт, мәта утәт олаңән

нын тәмхәтл лупсәты, мўң округев хўватн тәлүв. Па интәм лупум мосты верәт ищи нух вантдәлүв па елды ләщәтты питдәлүв».

Мәнум мирхотн округ кәща не ар од ияха вәлтты па ар няврем енмәлтты хоттел ёх «За любовь и верность» мевәл посәтн мәслә па мойлупсәтн мойдәслә. Щит Нягань, Югорск, Ёмвош па Советской районән вәлды хоттел хуятәт.

Айдат ёх вухн сухуптәлдыт

Вәщ тыдәшч 14-мит хәтлән Ёмвошн видеоконференция ширн округ правительства мирхот вәс. Щәта нявремат пата ләщәтты яң од олаңән путәртсы. Щив кәщайт, оса тәхетн рәпитты хәннехәйт, ар нявремәң хоттел ёх па айдат хуятәт әктәшсәт.

Округ кәща не Наталья Комарова лупәс, хуты йилуп од вўш эвәлт Россия мўв хўваттыйн Нявремат пата яң од ләщәтты олнитлы. Щит олат вўраңән округевн 1993-2017-мит олатн сема питум па интәм вәнты вәлды айдат ёх ипўш мәты вухн сухуптәлдыт. Ши вух вет шурәс шойта хойл.

«2018-мит одн мўң округевн вудаң верәт тывләт. Щит 25 ода йил Конституция поступсы вўюм вўш эвәлт. Щәдта 835 од хән мет олаң пўш мўң мўвев олаңән непек хәншсы. Щит пата нумәс юхтәс, ши айдат ёх, мәта хуятәт 25 ода йисәт, вухн сухуптәты. Депутатәт, оса тәхетн

рәпитты хәннехуятәт па ар няврем тайты хоттел ёх тәм нумәс пида кашашсәт. Тәм хәтл ма поступсыйн ёш пос пунсум. Тәм нәтупсы вух 515 шурәс айдат хуятәт вўд», — лупәс округ кәща не. Щит пата мосл Госуслуги сайт хўват заявления хәншты.

Югра Общественной палата тәхи кәща не Ирина Максимова путәртәс: «Тәм вер мўң мўвев пата шеңк мосл. Ши вер унтасн ям арат айдат ёх вух нәтупсы ёша павәтләт. Итәх хуятәт именеңа-икенеңа йисәт, нявремәт тайлдәт, дыв пәтлә щит ям нәтупсыя питл. «Югра мўвн сема питум па вәлды хуятәт» ши яснәт унтасн мўң

мўвевн вәлды хуятәт ияха катләсләт».

Нижневартовск вош эвәлт вәлды ар няврем тайты әңки Наталья Яновская щиты лупәс: «Ма нәмәслум, ям щит версы, хуты 1993-мит од вўш эвәлт сема питум нявремат вухн мәты питдыт. Мўң Россия мўвн вәлдүв, нявремлүв Югра мўвн сема питсәт. Вән пәмәшипа ясәң лупәс Владимир Путинна па кәща неңа Наталья Комарова, хуты дын мўң нявремлүв олаңән нәмәсләт».

Югорск па Урай вошнән эвәлт ар няврем тайты әңкеңән Елена Собянина па Елена Зольникова ищи пәмәшипа яснәт путәртсәңән.

Нявремат па айдат ёх ассоциация оса тәхийн рәпитты хә Марат Ласкин лупәс: «2000-мит од вўш эвәлт сема питум нявремәта Югра

поколений фонд эвәлт вух сухуптәты нумәс вәс. Па иса мир иньщәсәт: «Муя па тәп 2000-мит од вўш эвәлт сема питум нявремат вухн сухуптәты питдыт? Па нявремат па муй әтмәт?» Ин па, хән нумәс версы, 25 од мәр сема питум айдат ёх вухн мәты, щит шеңк ям. Айдат семья пата — щит вән нәтупсы питл».

Иса мирхота юхтум мир нух амәтсәт па округ кәща неңа пәмәшипа яснәт путәртсәт, щит сыр-сыр оса тәхетн кәпәртты ёх, ар няврем тайты әңкет-ащет па па рәпитты хуятәт.

Елды правительства мирхотн путәртсы, муй ширн нявремат пата верум яң ода округевн ләщәтыйдләт. Мәта хуятәт ши әхтыйн рәпитты питләт. Оргкомитет ух неңа Общественной палата кәща не Ирина Максимова пирысы.

Маина Лапина йис вэдупсы олаңан ханшад

Маина Афанасьевна Лапина (Неттина) ар ол ханты ясаң газетая арсыр верят олаңан ханшад. Лүв Тэкаң не, ханты вэдупсы верята вэн щаселдн Мария Ивановна Неттинан вэнлтасы. Маина Афанасьевна ханты ясаңан этты газетая 1990-мит олат вүш эвалт арсыр верят олаңан ханшад.



М.А. Лапина

Мет олаңан округ па финно-уграт культура олаңан айкелат тэтьдяс. Лүв ар ол наука щирн рэпитл. Увас мир веритлат шуши

мир щир вэдупсэт мүн эсалты непекевн лү-

натты. Щитат мет сыры Мария Васильевна

аңкел па Афанасий Григорьевич ащел, рэт па вөтан ёхдал эвалт йис мутрайт иньщасас па нух лэщатас. Кашаң верие там имие нух ханшасад па щит «Ханты ясаң» газетайн мир лүнатты веритлат. Йис верят арсыр тэхетн исыр антөмат. Маина Афанасьевна ханшум путарлад хуват кашаң хуят ар ям ут нумса пунал. Тамаш ханшты ёхлүв унтасн ханты яснев мет хураман. Щи йис путрат, моньшат, ара́т, мет эмаш нявремата муй па вэн хуятата уша паватты питл.

Раиса РЕШЕТНИКОВА

Амп хантэта мет мосты вой

Хантэт амп мет мосты воя тайлел. Лүв арсыр вератн шеңк яма нетад. Увас мўвн вўды тащ лавалты, хўл-вой ведпаслаты ёх амп такды ан веритлат вөдты.

Ханты йис путрат ищи амп олаңан ханшман вөдлат. И йис путран ханшман вөл, хуты Тэрум Ащи тэрум эвалт амп ил еслас, лөдн лүв ханнехөя ат нетас. Тэрум Ащи ампа ястас:

— *Мана! Наң елды вөнтан летут канша! Ил манум ёш илта ванга, нух манум ёш нөмалта ванга. Кашаң пурайн наң көщаен пўналн вөда па наң тэхен вөя.*

Йис путран амп ханнехө вой ведпаслаты вөнтас, вүдэт юкана тайты нетас, пўпи якхот яма лэщатты вөндас. Щит паты ханнехө йис путратн, моньшатн па ара́тн амп олаңан арийл. И хө путратан амп Вөрт икя арсыр вератн нетад, амп лывн похатур вөньдь.

И йис путран Вөрт ики амп хурасн, лүв мень хуца юхтас. Щи Вөрт ики хўв, шик өптат тайс, и пелакн лүв улас, хашум патладн лап лаңкасылас.

Щи Вөрт ики итэх хантэт лавалман тайл, щи хантэт паты амп — мет мосты вой. Дыведа ан рэхал амп шөкатты, амп шөпи вўшматы, ампат пелды дяватты, неңата ан рэхал амп пўн эвалт тыюм лөматсухат тайты (Тек көрт пўналн вөдты хантэт).

Ханты хўвн ампат, матты, путартты хошсат, төп мулты верят юврая вермед юпийн Тэруман щи хошты вер юхды вўсы.

Тэруман тылащ пўна́дн ванашак лодты хөс — тылащ амп. Ампат эвалт рэхал вөйтты,



муйсәр тэрум па хатл питл. Амп лоньщ өхтын кератляд ки — вотаса йил, амп ведпаслаты утат шөпи вўшмал ки — ведпаслаты вер яма манал, амп олаң төдан менатладлэ ки — лүв көщайл юхи ведпас төл, көща неңа мосл көра пўт омасты.

Амп олаңан ар аматщи вөл. Ил ул — калаш, нух лодь — вөдас.

Ведпаслаты вер паты вўты ампат мосл яма нух вантты, нюлад пос ки тайл — лүв лаңки яма ведпаслаты питл. Пасты кўншат, питы семнаң, потум питы нюл — щит мет ям ведпас амп.

Ханты мир поэтат амп олаңан ищи ар стихотворения ханшсат.

Маина ЛАПИНА

Ханты газета сәмәлдн тәйләлэ

Рима Константиновна Слепенкова 1992-мит од вўш эвәлт «Ханты ясаң» газетая ханты мирев вәлупсы, ханты ай кәртәт олаңан айкеләт китгы питәс. Ши пурайн лўв Нуви сәңхум район луватгын рәт ясаңан радивайн путәртәс па рўщ газетайн айкеләт хәншман рәпитәс.

Рима Константиновна Тўкьякәң кәртән 1956-мит одн Ас потты тыләщ 13-мит хәтлән ханты семьяйн сема питәс. Тўкьякәң ашколайн няд класс етшуптәс па Поднавәтн интернатн вәлман нивәд класс вәнты вәндтыләс. Ши юпийн Пулцавәт воша культпросвет училищая вәндтыйдты мәнәс. Әхәтшәк лўв Санкт-Петербург вошн Герцен немпи университет заочной щирн етшуптәс, культуролога йис.

1975-мит од вўш эвәлт лўв Тўкьякәң кәртән нявремәт хәтл мәр давалды хотн рәпитты питәс. 1979-мит одн рәт кәртәлн лапкайн пиркашека йис. Щәта лўв икия мәнәс, айлат семьяйн кәт няврем сема питәс. Щиты вәсәт па рәпитсәт. Хотәң әх шәкн юхәтсы, Рима Константиновна икиды хәщәс.

1984-мит одн лўв эвәл пидә Нўви сәңхум воша касәлты сонтумәс. Олаңмит олаңн нявремәт хәтл мәр давалды хотн рәпитәс. Щәта лўв кимит пўш ики верәс па кәт пухәд сема питсәңән.

Ши пурайн тәм ханты не нумәсн вәс мулты айкел хәншты. Лўв



Р.К. Слепенкова

1991-мит од вўш эвәлт «Белоярские вести» газетая айкеләт хәншты питәс. Вантэ, щәта хәнты газетә антәм вәс, 1992-мит одн лўв хәнты ясаңан путәртты радивая рәпатая вўсы. Лўв щәта хәнты мир вәлупсы, нўша верәт олаңан путәртәс. Па ищи одн Рима Слепенкова «Ханты ясаң» газетая айкеләт хәншты па китты питәс. «Мет олаң айкел хәнты пух Виктор Алексеевич Себуров олаңан хәншсум. Щәта путәртсум, хуты саты лўв вәд Нуви сәңхум вошн, хута рәпитл», — нәмәсыйл Рима Константиновна. Рәпитмәлдн лўв арсыр вошәт па кәртәт хўват яңхәс, шуши хуятәт пидә вәйтәнтәс па лыв олаңдн хәнты газетая хәншәс. Лўв газета мухты округ мира путәртәс арсыр шуши мир емаңхәтләт олаңан, мәтайт Нуви сәңхум районән версыйт.

Вантэ, Рима Константиновна хәнты мир культура тәса вәлдә. Щит пәты Нуви сәңхум вошн па Поднавәт, Тўкьякәң кәртәңән иса емаңхәтләт ләщәтты па верты нәтл. Елды ши олаңан хәншәл.

1995-мит од вўш эвәлт лўв «Фольклорный архив северных ханты» тәхийн рәпитты питәс. 1992-мит одн Ева Шмидт пидә вәтаңа ювмал юпийн хәнты кәртәт хўват яңхман лўв пирәщ әх эвәлт моньщәт, арәт, йис путрәт хәншты питәс. Щәлта щитәт «Ханты ясаң» газетая китыләс. Ин ши тәхи шуши мир яснәт дерамтты Ас-угорской института йис, ин вәнты Рима Константиновна щәта ши рәпитл. Ияха ки лўнәтты, лўв хәнты газетая ветьяң мултас айкел хәншәс. Па ин вәнты мулты емаңхәтл районәлн питыйдки, лўв мўңева ши олаңан айкел ям хурәт пидә китл. Щит пәты лўвела вән пәмәщипа.

Лўв «Ханты ясаң» газета кашәң номер лўнәтл. Лўв лупәл: «Газетам лапәт ант ки вантләм, лыпем атма ши йил. Хән юхәтл, олаңәл эвәлт пәтәд вәнты ши лўнәтләм». Мосл лупты, Р.К. Слепенкова хурамәң тур сый тәйл, хәнты арәт арийл, хәнты щирн тәса якл, рәт мир дәмәтсух әнтты хошл. Ши вера нявремләд вәндтәслә, ин хидыдал вәндтәл. Щимәщ каркам имие хәнты мирев күтн вәд.

Надежда
РАГИМОВА

Ма ясңем «Ханты ясаң» газетаема

Вўща вәлаты, «Ханты ясаң» газета хущи рәпитты мир! Хәншәл нынана Белоярский вош эвәлт Рима Константиновна Слепенкова.

Ма ләңхалум лупты «Ханты ясаң» газетая ям ясаң. Тәм газета ма хәншәлүм ям хўвән, кашәң од. Пәмәщипа лувел лўв вәдтал пәта, щәта рәпитты хәннехәйтә. Ма кашәң лапәт даваллүм тәм газета, мәнәма омәщ лўнәтты лўв айкелдал.

Тәм газета хущи сыр-сыр ар путәр вәд, моньщ, амамәтщет, арәт. Тәмхәтл вәлты вер олаңан хәншләт, щит ям, әмщә лўнәтлүм йис путрәт, моньщәт, арәт мўң хәнты мирев вәлүм-холүм әхтйин.

Мария Кузьминична Волдина пәмәщипа, лўв тәм газетайл пә-

ты сәмәд кәши, сыр-сыр ям верәт олаңан хәншәл, путәртәд мир-хотәтән «Ханты ясаң» нух алүмты пәта, лўв хәншты путәрдал, моньщәд ма лўнәтлүм, щиремән щәлса ма нявремлама путәртләлдам (вәндтәлдам хәнты ясаңә).

Муй арат ар ода йис тәм газета «Ханты ясаң», сыры па нем тәп тәйс. Вән пәмәщипа лўв вәдтал пәта, сыры мўң аңкилав, ащилав хәнштыйдсәт кашәң од тәм газетая, ин па мўң, лыв нявремләд, мўң юпевн па ләлн мўң нявремлўв па әт хәнштәсәт ләлн, па әт лўнәтсәт тәм газета. Муй ям мәнәм мосл,

ма иса вәйтлүм тәм газета хущи.

Ин па ләңхалум «Ханты ясаңә» лупты хўв йис, хўв нәпәт щәта рәпитты мира, тәлаң әш, тәлаң күр, ал кәшитаты, «Ханты ясаң» газетайн елды тўвалдн яма!

Нын газетайн хущи ма ләңхалүм елды па шуваләты йис арәт, моньщәт, путрәт. Па ищиты мўң Увәс мир хуятлўв вәлупсы олаңан, лыв хурдал пидә тәм хәтл, тәм йис.

Кўш кепи лавәрт нынән па ем әнтәм сәр, нуви тәрүм артән елды па рәпитатн ищиты.

Ям вўща нынан, М.К. Волдина па Т.С. Себурова!

Р. СЛЕПЕНКОВА
«Ханты ясаң», 12 февраля 1994
од №7 (2412)

Ханты мир арят

Зоя Никифоровна Лозямова ай кер тылăщ 30-мит хатăдн 1945-мит одн Касум мўвн Ай хяр саяхум кертан Никифор Петрович Волдин па Прасковья Макаровна Тарлина хотн нўви Тарума юхтăс. Ай эвие ханты мир вѳлупсыйн енмăс. Щи щирн кашăң йис вер тѳса хошл верты. Лўв арсыр олăтн «Ханты ясаң» газетая мирд арят па юкан стихдал китылăс па айкелат ханшилăс.

Тамăщ лампа кар-кам ханнехѳ 1983-мит одн «Арăң мощне» тă-хи пўншăс. Лўв щата Ёмвоша вѳндтыйлдты ай кертат эвăдт юхат-ты эвет ханты щирн ариты па якты вѳнд-тыйдсăдѳ. Щиты 1987-мит одн «Арăң мощне» народной немн мăсы. Щи тумпи Зоя Никифоровна йинпăд катăдты па хошăл, щи пăта «Народный мастер

России» нем тăйл. Лўв ар од мър «Торум Маа» йис пурмăсат шавиты хотн рѳпитл. Ханты мирăд вѳлупсы яма вѳтăд па елды тѳтăд пăта «Заслуженный деятель культуры Ханты-Мансийского автономного округа — Югры» немн пунса.

«Ханты ясаң» йис газета ванттыйн ванкўтды Зоя Никифорова непека нух хан-



З.Н. Лозямова

шум ханты мир арят шувалăдн. Щиты, «Ханты ясаң» 30 ноябрь 1993

од № 48 (2401) номерн арят ханшумăт.

Ульяна ДАНИЛО

Арăта дыл мăд...

Зоя Никифоровна Лозямова олăңан мўң ар пўш ханшийдсўв. Там елпи газета номера лўв тѳс ханты мир арят, мăтайт лўв арилăлдѳ ивулапа па ин ясаңдал ханшлăлдѳ.

Ин па арят па ясаң-лăд ханшсăлдѳ, ищи мир арят, ариюм ѳх итѳх немăт худна вѳлдыт. Поднавăт ими ар — щит Евдокия Ивановна Молданова ар, сот мулдас од нуви тарумăн вѳс, ин па мирн, нявремăтн яма нѳмла, мăттакем ар ар хăйс, йи арăд щи ин нын лўнăтлăдн.

Сора хѳ ими ар — щит йис ара йис, ари-юм ими немд ѳнт хăщăс.

Сăран Ванька ими ар — щит Татьяна Александровна Попова ар, щи неңиев ин па вѳл. Щиты З.Н. Лозямова щи арăта дыл мăд...

М. Волдина

Поднавăт ими ар
Поднавăт имилѳңкен хуты.

Кирида, ванта, ванта, ванта

Тўпăлѳп тăм-тăм, тăм-тăм, тăм-тăм, Поднавăт имен тăм-тăм, тăм-тăм, тăм-тăм,

Ин Петър кўтуп икилѳңки, Ямла пелăк ям лăңкрийен Нăң ки кертылумен-ие, Луртум ухуп вет солдатна Имилѳ доньлщиялдем, Ямла пелăк ям шанш олңен,

Няриен хунпи вет эвийна, Эвийна омсăдтыялдем. Касум пўнăд вет вошием ѳм юх сѳвпи вет эвийна, Эвийна еслдымемие. Ма ям пушăхдам хўваттыйна, Юхан пўнăд ар кертыем Ныкды мăнлум, нянял

делум, Нянь ки девмем, эвмăң
Вўтды мăнлум, шайл лўв вѳлмал,
ьяньюм. Шая ки яньщмем, эвмăң
Петър кўтуп икилѳңки, лўв вѳлмăл.
Ям пушăхдам ин ям

пăта, Сăран Ванька ими ар
Аспащипа, ой-ой-ой, Мужи вошăң ими вѳн
Пѳмашупа кѳнешна. меньлен,

Дахсум
Дахсум кѳрты хăрыемăн хирмал,
Ким ки этлум ин атѳлт хирмал,
не, Юхи ки лўңлум ин атѳлт хирмал,
не. Сăран хирмал, ѳнт

Дахсум доры па хирмал,
пелкемăн, Сăран хирмал, ѳнт
Каршиен латмăң хѳлум хирмал,
вѳнт нюл, Дыйн хонмал, ѳнт
Сывсыен латмăң хѳлум хонмал,
вѳнт нюл, Ма щи, тăм щи юрăн не,
Унăл хан вуйдилăтѳл, Тум щи, тăм щи юрăн не,
Нялум хан вуйдилăтѳл. Сорăң, верăң, юрăн не,
Дахсум доры ям Верăң, сорăң юрăн не,
йиңкием, Хўв мўв ими вѳн меньлѳн,
Тѳвăн хăтлăл лўв ки Мужи вошăң ими вѳн
вертăл, меньлѳн

Сос ведты нелѳңкен,
Вой ведты нелѳңкен.
ѳнт ханты мир арят шувалăдн. Щиты, «Ханты ясаң» 30 ноябрь 1993

Тѳс най Аңкем ѳнтылум
Лерăң овуп ям сѳна
Лўв щи хўвдыялѳтăл.
Ин вот хăтлăл ки верăл,
Щўрăң хот пăдат кăрăщ хумпăд

Халѳвăн латыйялѳтăдие.
Дахсума доры ям
йиңкием

Там арят непека
Зоя ЛОЗЯМОВА
ханшăс

Паста довадсат

Ёмвош округ ханты, вухаль па юрн мир ай хопатн касты Нефтеюганской мұва лыпāt енумты тылāщ 30-мит хātдāн па вўш тылāщ 3-мит хātдātн āктāщийдсāt. Мет олāң пўш юрн хопātн Нижневартговской районāн Ларьяк вошн 1978-мит одн кāссāt. Мосд лупты, Югра мўвн вēдты шуши мир кўтēдн хопн 16-мит пўш кāсслāt.

Ши кўтн вет ол мār тām емāңхātл Ёмвош округ губернатор нем эвāлт дēщātлдā. Юрн хопн касты вер Югра мўв дуваттыйн елды тēты вухаль мир вән хāннехē Анатолий Прокопьевич Кауртаев дēщātс. Лўв кашāң ол хопн касты юхтыйд.

Тām эмāщ емāңхātлдā касты щира 200-кем хуят āкмилдс. Мир Югра мўв эвāлт, Тюменской область па Исландия эвāлт касты юхтыйдсāt. Тām вән емāңхātл Йиңк Вēрта пойкщāты щира дēщātыйлдс. Ар ēх āкмум хārн вўщайн ясāң Ёмвош округ губернатор ими **Наталья Комарова** лупās:

— Вўща вēдаты, йис путрāң па моньщāң мўвн вēдты ешāк шуши

мир! Вантэ, хāнтэт па вухалят тарнāң йис арātн па моньщātн мет тēs вēлупсы пиш щātа вēл. Йиңк пēда ки, āңкардāн юханāн, дорāн вēдты Най-Вēрт нумāsа питл. Щālдта хўв йис телдāн хāннехēйт кēртāt па вошāt йиңк пўңāда верийдсāлал. Ин тāmхātл мўң Йиңк Вēрта яха пойкщāлўв. Мет шопāң хāнты па вухаль мир йис вēлупсы елды тēлэв.

Елды юхан хонāңāн Йиңк Вēрта пāsан дēщātс па сэрханл хāнты икенāн Даниил Покачев па Сергей Кечимов пойкщāснāн.

Тām од юрн хопн касты тāхи пēда вантты Финляндия мўвн Лапландия кēща ики Мика Риипи, Россия мўв Совет Федерация



Н. Комарова па Мика Риипи нух питум ēх пēда

эвāлт Эдуард Исаков, Югра мўв дуваттыйн мет вән Федеральной инспектор Денис Кузьменко па ши тумпи мойң ēх Красноярской край, Чукотка, Таймыр, Исландия, Аляска эвāлт вēsāt.

Имўдтыйн ай юханыев йиңк ши нюхлās. Щит имет хопн касты делумсāt. Щālдта ар имет кўтн мет пās-та Нижневартговской мўв эвāлт Варьеган кēртāң не Ирина Сухих довадтās. Икет кўтн сора хоп Нижневартговской район Аган кēртāң хē Юрий Казамкин тāй-

мал. Ши тумпи мет олāң тāхи вēнта Нижневартговской район команда пāта касум ēх юхātсāt. Дыв Губернатор кубок вән мой дупсы ēша пāvātсāt. Кимāt тāхи вēнта Сэрханл район эвāлт ēх довадсāt. Хēлмит тāхия Когалым вош хāнтэт юхātсāt. Тām емāңхātлн юрн хопн мир лодьман кās-лāt. Щālдта и хопāн кāt, хēлум па няд хуятн омāsман довадлāt. Щит шеңк эмāщ емāңхātл вēs.

**Ульяна
МОЛДАНОВА**



Ай пухие сора мāнл



Н. Казначеева, А. Кауртаев довадлāңн

Кӕрӕщ сӕнхум олаң кӕртыев 235 олд постӕс

Кӕрӕщ сӕнхум олаңан Ас кимӕдн мулды йисӕн Ванщавӕт кӕртыев омсащӕс. Мӕн вӕн щатыщацилдӕв дантаң-хӕлдӕн Асыев пуӕдн, воньщумутӕн, вӕнт вояң вӕнтые депн вӕлды тахи пирисӕт.

Вӕщ тыдӕщ нивӕд-мит хӕтдӕн Ванщавӕт ӕх 235 олд кӕртӕд нӕпӕт амӕтман постӕсӕт.

Емӕнхӕтл «Сема питум хӕтдыен пида, тынӕн кӕртыев!» немпи велосипедӕтн кӕсты верн олцитсы, хута кӕрт хуӕват хӕлумъянӕкем хуят мӕнсӕт. Ши хӕтл кӕртӕвн А.А. Дунин-Горкавич немпи лутӕн сохӕд доньщлтӕсы, лӕв уӕс мир вӕлупсы уша верты ӕшӕд мӕн мӕвев хуӕват мӕнӕс.

Нуви сӕнхум район кӕщаев С.П. Маненков хуӕв мӕр яма рӕпитты кӕртӕн ӕхлӕва ишӕкты непекаӕт мӕс. Щит А.Т. Клещенок — нывремӕт вӕндтӕты хӕ, В.Н. Попова — хуӕв мӕр пиркашека рӕпитты не, В.Д. Сандова — 40 мулдас олд почтайн рӕпитум ими ӕша павӕтсӕт. Поднавӕт кӕрт «Почӕт киникая» ныв-хушӕн Ванщавӕт

хуят хӕншайт, вӕн не-тупсы шушивӕлупсы тӕтӕд пӕты.

Ям вӕуца ясӕн пида округ Дума депутат хӕ А.В. Новьюхов юхтӕс, лӕв уӕс мир верӕт елды тӕты ӕха ишӕкты непекаӕт ӕша катлуптӕс.

Сӕм хӕры ӕвӕлт йиты ясӕн-путӕр тӕсӕт «Югра дьлднуптӕты» оса тахи олаң вице-президент Н.Б. Костылева, Поднавӕт кӕща дӕнӕкӕр хӕ Е.У. Уразов, Югра мӕв вӕлды тайты ӕх тахи президент С.А. Кечимов, Лянтор вош вӕды тащӕн хӕ К. Кантеров, хуӕв мӕр Ванщавӕт кӕртӕн «Победа» немпи колхоз кӕщая рӕпитум хуят Л.И. Калашников.

Сувӕн арӕт па тӕс хӕнты якӕт пида мӕн емӕнхӕтлӕва Поднавӕт ӕвӕлт «Родник» немпи культура хот ӕх, Касум ӕвӕлт Валентина Тарлина па па мойн хуятӕт юхтыйлсӕт.

Ӕктӕщум кӕртӕн па мойн ӕха Владислав Молданов рӕт мӕвиел олаңан лӕнтум стихотворенияйт вӕн амӕт тӕсӕт. Ӕмща па тӕса яксӕт «Сулдумие», «Щед вуй елпуп ерт» немпи кӕртӕн якты тӕхет па мет ай тӕпиет «Хӕншты юх» немпи якелӕн мет шопӕн вӕн амӕт тӕсӕт.

Кӕрт вӕлупсы сӕк келиты яха кӕртӕщд кашӕн хӕтл вӕлупсы ӕвӕлт.

Ар нывлак ясӕн тӕм хӕтл нӕптӕд вӕна ювум ими А.П. Яврова хӕлӕнтӕс.

Тӕм олд кӕртӕвн кӕт йидуп семья тывӕс. «Тӕт семиевн» якты ӕвиет хӕнты як ар олд мӕр яха вӕлды пидӕта мойдӕсӕт: Сергей Борисович па Нина Васильевна Шабаршинӕна (35 олд), Евгений Витальевич па Светлана Михайловна Поляковӕна (30 олд), Юрий Алексеевич па Марина Михайловна Кондинӕна (25 олд).

Кӕртӕвн ар ай нывремӕн тыхӕл: вет пушхие енмӕлдӕт Татьяна

Михайловна па Валерий Борисович Русмиленко, Наталья Анатольевна па Денис Александрович Юминӕн.

Мӕва-йиңка сӕщман вӕлдӕт сорни ӕшти верӕн ӕхлӕв: Ю.П. Гындышева, М.Г. Кондина, И.Е. Арабок, Сергей Анатольевич, Галина Герасимовна, Надежда Денисовна, Галина Кузьмовна Молдановӕт...

Кӕртӕвн таксар хот кӕщайт, апрӕн ӕшти пилдӕд пида вӕлдӕт.

Вера па Валерий Тимиргалеевӕн вӕлды хотыен кашӕн олд ши мурта хурамлӕтн — хот ова пӕрумдӕн — нюр Моньщ хота луңсӕн.

Елды пелы мӕн тынӕн кӕртыевн нӕптӕна-пищӕна, сӕмӕна рӕпитман дӕдн ат вӕлдӕв. Муй ширн мӕн кӕртӕн хӕев Г.Н. Дыбин арӕдн нӕхмӕс:

«Ванщавӕт кӕртыев, нӕн хуӕв нумсуп, лутӕн верлӕн елды вӕлдӕт!»

**Нина
ШАБАРШИНА**



Кӕртӕн хуятӕт ӕмӕщ этнхот ванлтӕсӕт



Емӕнхӕтла юхтум мир

Хўд ведпӓслӓты ёх эмӓщдӓсыйт

Вӓщ тыдӓщ 9-мит хӓтлӓн «Югра лыднуптӓ-ты» оса тӓхи «Династии рыбаков» вер хўват Ваньшавӓт кӓртӓн хўд ведпӓслӓты ёх емӓнхӓтл постӓсӓт.

Хўд ведты вер шеңк лавӓрт рӓпата. Сыры вӓдтийн колхоз план тӓрматты мосӓс па хоттел ёх иса сыта ат вӓсӓт. Ин ищи хўд таклы увӓс мир вӓлты ӓн верӓтлӓт. Ям ясӓнӓн нӓмӓлмӓсўв лўнӓнтӓдн ведпӓслум ёхлўв: Николай Никитич, Артем Андреевич, Герасим Никитич, Василий Иванович Молдановӓт, Борис Никитич Русмиленко, Владимир Алексеевич Тарлин.

Нявремӓт ведпӓс вер елды тӓты хуятӓта Владислав Молданов хӓншум стихотворенияйт сӓмӓна лўнӓтсӓт. Ай пушхиет «Вўтӓн Ас ведпӓс ёх» немпи вандтупсыя хурӓт хӓншсӓт, ши тумпи амӓтман юнтсӓт-яксӓт.

Кӓртӓн хуятлўв па мойӓ ёх хӓтл хўват суваӓн ариет хӓдӓнтсӓт, арсыр эмӓщ юнтӓтн-пищӓтн кӓссӓт.

Лӓпӓн хопн кӓсупсийн нух питсӓт: Н.Г. Пичерская, Т.М. Русмиленко, М.Л. Бабанина, Р.П. Гришкина, Г.К. Молданова, В.Н. Попова, О.В. Хуланхов, Р.А. Ибрагимов, Ю.Р. Федотов, Николай Макрушин.

Емӓнхӓтл мӓнум Ас кимӓлн лапӓт хӓшӓп йирсы, хута мавӓнсураӓн ташӓн пӓсанӓт дарпитман вӓсӓт. Муй па хӓшап кӓшайт шив ӓн омсӓлсӓт: ай сулпи хўд, кавӓртум, пӓсӓнӓн пӓсӓлдум хўд, шӓмӓх, содамӓт, котлетӓт, хўдӓн нянь, мӓрӓх, нохӓр сем... Ши

тумпи хӓшапӓт сорни ёшн верум пурмӓсӓтн хурамтсыйт, хӓшап дыпийн верӓнтты хӓрӓт мӓнсӓт.

Жюри тӓхийн пириман вӓсӓт: Югра Дума депутат А.В. Новьюхов, Югры вўды тӓйты ёх Союз ух тӓты хӓ С.А. Кечимов, Лянтор вош эвӓлт вўды ташн рӓпитты айлат хӓ К. Кантеров, Ёмвош эвӓлт дутӓн мойӓн хӓ Л.И. Калашников, Нуви сӓнхум вош «Югра лыднуптӓты» тӓхи кӓща не А.И. Ледкова.

Р.П. Гришкина хӓшап «Лылӓн йис вӓлупсы» немӓн мӓсы. Е.Т. Юмина хўвӓн ёнтум хӓшап ведпӓслуман, турӓн верман педӓн-нямӓлт эвӓлт сай кӓншман иса пӓнӓн хопӓн тӓтьлясы. Хуланховӓт хӓшап «Таксар ёх» нем холумтӓс. Лўв опрач немед «хўдӓн хоп» ясӓн эвӓлт мӓнӓл. Тӓдн муй лўнӓн лўв ӓхӓлдал муй хопдал талӓт ӓн вӓлдядӓт. Вет нявремӓн Валерий Борисович па Татьяна Михайловна Русмиленко хӓшап «Тӓдаӓа вӓлупсы» немӓн мӓсы. Валерий Борисович емӓнхӓтӓдн дӓщӓтӓс арсыр кӓсты вер, лўв хоттел ӓхлӓл ищи йирн ӓн хӓщсӓт.

Н.Г. Пичерская хӓшапн шӓмӓх, содамӓт десўв. Лўв хӓшапд «Юремӓты летутӓт» нем вўс. Ю.П. Гындышева хӓшап хурамман вӓс намтӓтн, щитдал лўв эвидал, хилнедал пида ёнтӓл. В.Н. Попова хӓшап «Ведпӓс ёх» немн



Мойӓ хуятӓт Ас хўдн лапӓтлўйт



Гындышевӓт хоттел ёх

мӓсы. Лўв кашӓн лўн ащӓл-ӓнкел пида Ванпанӓн ведпӓслуман вӓсӓт. Ф.П. Иштимирова ёнтум хӓшапн вӓсӓт арсыр пурмӓсӓт: аканят, мевд лопсӓт, хӓнты усум хирӓт, ернасӓт, эвиет щӓта ӓнтупкел сӓвты, акань верты хӓр лӓщӓтсӓт.

Мойӓ вудаӓн ёхлўв Ас хўд левмед юпийн щиты луплӓт: «Мўн нӓмӓсўв вўды нюхи тумпи немӓлт еплӓн детут ӓнтӓм, нын хўдӓн мет шопӓн ши еплӓнӓт».

Кӓртӓн ёхлўв «Югра лыднуптӓты» тӓхи вице-президента Н.Б. Костылева ям мойлупсӓт хўд ведпӓслӓты ёх емӓнхӓтӓдн миум

пӓты пӓмашипа ясӓн луплӓт. Емӓн хӓтӓдн мойӓн ёхлўв вӓн нӓтупсы тӓсӓт: Ольга Акушка — Ноябрьск вош эвӓлт, Людмила Туполева па Раиса Афанасьева — Поднавӓт неӓиенӓн. Мет шопӓн вӓн унтас тӓс Ф.П. Иштимирова — Югра мўв культура заслуженной рӓпатнек. Лўв кӓт хӓтл мӓр емӓнхӓтл тӓты ух неӓа вӓс.

Фаина Павловна лупӓл: «Мӓнема вӓн амӓт — ма енмум тынӓн мўвема артнем мӓсум». Кӓртӓн миревн па мойӓн ёхн тӓм эмӓщ хӓтлӓт хўв мӓр нӓмты питлўйт.

**Нина
МОЛДАНОВА**

Увӑс мўва вӑн емӑҗхӑтла яҗхсӑт

Лыпӑт енумты тылӑшн 23 па 24-мит хӑтлӑнӑн Шурышкарской районӑн вӑн емӑҗхӑтл вӑс. Шив Ямал па Ёмвош округ эвӑлт мир ӑк-тӑшийдсӑт, лӑдн йис верӑт, арӑт-якӑт, верум пурмӑсӑт ванлтӑты па путӑртты, муй ширн щит елды тӑты па лавӑлман тӑйты. Ши олдӑн арсыр научной, культура тӑхет эвӑлт юхтум хуятӑт пида вӑйтантупсӑт, семинарӑт верӑнтсыйт.

Шимӑщ емӑҗхӑтлӑтн вертӑтӑҗ хӑннехуятӑта арсыр мир пида вӑйтантыйдты па мулды мосты па йилуп ут уша верты шир вӑд. «Этнокультурное общение: опыт, проблемы, общение» семинар пурайн мойҗ хуятӑт путӑртсӑт муйсӑр суртӑт культура верӑт ӑх-тыйн тӑм йисн тывлӑт, муй ширн щит ияха

катлӑсман лӑщӑтты мосл.

Тӑм вӑйтантупсыйн соткем мултас хуят Шурышкарской район мўвн ӑктӑшсӑт. Щит Шурышкары, Овгорт, Мужы, Пулӑнавӑт, Тарко-Сале, Дапӑт нӑҗк па Ёмош округ эвӑлт культура верӑт тӑты, шўкшӑты па ариты-якты хӑннехуятӑт вӑсӑт. Нуви сӑҗхум



Еплӑҗ нянь пида мойҗ ӑх ешалт ӑтсӑт

район эвӑлт шив Нуви сӑҗхум вош, Касум, Поднавӑт, Тўкьякӑҗ кӑртӑт шўкшӑты хуятӑт яҗхсӑт. Ши хӑтлӑт мӑр ванлтупсӑт верӑнтсыйт, вертутӑҗ ӑхн ӑнтум, тыюм, юх эвӑлт верум, сӑк эвӑлт кӑртум пурмӑсӑт мира ванлтӑсыйт. Дыв кў-тӑдн мойҗа яҗхсӑт па путремӑсӑт, хуты елды вӑйтантыйдты па ияха и нумӑсн рӑпитты питлӑт.

Арсыр тӑхет эвӑлт юхтум якты-ариты хуятӑт вӑн етхот версӑт.

Дыв сыр-сыр шуши мир апрӑҗ якӑт яксӑт па ӑмӑщ арӑт арисӑт.

Муйсӑр емӑҗхӑтл еплӑҗ хўд хошум йинк па шуши мир летутӑт так-ды вӑлдял. Мойҗ хуятӑт мурта лапӑттӑсыйт, яньшлӑтсыйт па ишӑк непекаҗтн, мойлупсӑтн мойлӑсыйт.

Ирина ФИРСОВА,
Россия народной
мастер не

Хӑнты ясаҗа
тулмашлӑс
Надежда ВАХ



Сӑран имет мирхотн омӑслӑт



Нуви сӑҗхум район эвӑлт юхтум неҗӑт



Хурамӑҗ хӑнты имет

Ханты йис верат лэщатлат

Тамхатд ма Лянтор вош хурамач пурмасат верты тахи оланан ханшты дачалум. Ши оланан манема там тахи кэща не Ольга Вячеславовна Шабалина айкел тэс.

Там тахи 2010-мит одн тывас, сыры шит народной творчества хот вэс. Лянтор вошн 52-кем арсыр мир вэл, шит паты арсыр мират пурмасат верты тахи пуншы. Тата мет ар ханты мир культура верат тэдыйт. **О.В. Шабалина** шиты лупл:

— *Ин мун хушева 21 тахи рэпитл, 14 тахийн нявремат эшн арсыр хурамач пурмасат верты вэндтыйлдат. Сыры ханты верантты эх народной промыслат па ремеслайт отдел хуша рэпитсат, шит Пим юхан хонанан вэс. Дыв арсыр ханты мир хурамач пурмасат версат па елды тынысат. Шата нявремат иши вэндтыйлды шира юхтыйлсат, тэл ши хот вош эвалт елншак вэс, ширн шившимд няврем янхас.*

Интэм там тахийн рэпитты эх худыева «Мастер народно-художественных промыслов Югры» нем тайдат па нявремат арсыр эш верата вэндталат. Центр хуша мет вулаң вер – шит ханты мир йис культура елды тэты. Лянтор вош пунан Пим юхан хантэт вэлдат, ширн там тахи рэпатнекат юхан хуват янхлат па пираш эх эвалт арсыр верата вэндтыйлдат, непека ханшлат, хур вудат, кина вердат. Шиты ям арат ол юхды дыв Анна Петровна Нимперова вут кэрта мойна янхсат. Лув кат щос мар иса



О.В. Шабалина вандтупсийн

вандтас, муй хошл верты. Лув эвалтала Центр хуша рэпитты не Надежда Харчевникова Пим юхан ханты ширн антуп тыйты вер оланан уша верас. Ши юпийн Н.Г. Харчевникова ар хуят ши вера вэндтас. Лув «Мастерица» па «Забава» немпи тахенан нявремат эшн арсыр пурмасат верты вэндтал, ши тумпи имет пидарийл. Ин там тахийн рэпитты эх иса Сэрханл, Нижневартовской, Нефтеюганской районат хуват янхлат. Ипуш центр хуша рэпитты не Анжела Обирина лув пидала рэпитты эх Угут кэрта мойна вохас, шата лув щасел вэл, лув муй тэп верты ан хошл.

Вут кэртат эвалт юхаттэдн дыв имухты ямсыева непека кашан вер оланан нух ханшлат, ши тумпи ши вер оланан киникайт лунатлат, ши юпийн кашан вер оланан непекайт есалдат.

2011-мит ол вус эвалт Лянторской центр эх нявремат паты «Ремесла и промыслы: прошлое и настоящее» немпи научно-практической

мирхот лэщатлат. Кашан ол аршак няврем шив нумсан непекайт лунатты па арсыр верата вэндтыйлды юхтыйлдат. Вантэ, там тахийн рэпитты эх нявремат арсыр верата вэндталат, ши юпийн ияха нумсан непекайт ханшлат. Шиты эвет-пухат нанк кар кавартсат, дэпи сэвсат, нохар юх дер эвалт хушап, юнтупсэт сэвсат, нюки тандсат, намат энтсат па па верат версат. Ши тумпи Лянтор вошан нявремат Емвоша янхлат, тата «Центр народных художественных промыслов и ремесел» хотн кашан ол ишимаш нем тайты научно-практической мирхот вэлдыл. Ипуш 2013-мит одн тыв Лянтор вош эвалт 15 няврем кэщайдал пидар юхтыйлсат.

Лянторской центр хуша кашан тылащ юхи хашум лапатн и верантты ханнехэ вандтупсы, вэндтаты хар лэщатл. Ши хатлат мар вертутаң хуят лув олналн ай тэл, вандтасл, муй хошл верты па па эх арсыр верата вэндтал. Там пура вэнтты шукшаты хуят лув вердал

оланан ай киникайт ханшал. *«Мун хушева ай киникайт есалты вер яма манл. Кашан верантты хуят муй хошл верты, ши оланан ай киникайт лэщатл. Шитат ал хуятан яма лэдыйт», — лупас Ольга Вячеславовна.*

Шалта Ас потты тылашн «Ханты ханшет» немпи вэн вандтупсы лэщатлы. Сыры ентум ернасат, севум вейт, арсыр турлопсат па па утат немасья арталаты эх нух вантлат, лэдн иса ханты ширн верман ат вэсат.

О.В. Шабалина лупас, ям арат ол юхды лув округ губернатор грант вух эша холумтас. Ши вух унтасн ханты мир эш верат оланан лапат кина версы. Ин шит интернет хуват вантты рэхл па вэндтыйлды.

Лун пурайн нявремат паты «Галерея ремесел Югры» немпи вэн вандтупсы лэщатлы. Вантэ, и харн шивалаты рэхл, муй ширн пелан эвалт сух верты, шалта шашкан тыйты. Кашан эви муй пух веритл ши вер оланан уша верты. Па харн шанш кел сэвты, па тахийн акань ювартты, хул сух тандлты па елды мулды ентты, ханты ханшан вейт тывты па па верат оланан уша верты.

«Тэл и вер мун хушева вэл — вух рэпитты мосл, ширн кашан вэндтаты хара юхтум няврем паты анкеташет вух сухуптлат. Ши тумпи мун тахэс эх арсыр рэпатыйт тэлдат. Лянтор вошн арсыр еманхатлат лэщатты нэтлув».



Т.Ю. Карымова

Югра мұв писателят Ю.К. Вэлла
немүш музей хот йитн

Юрий Вэлла музей хот олаңан

Ай кер тыдәшн Нижневартовской район луваттын Ёмвош, Сәрханд па Мегион вош эвәлт юхтум поэтәт па писателят арсыр тәхетн нявремәт пида вейтантылдсәт па вейтантупсәт дыв пиләда ләщәтсәт.

Варьёган кәртәң кәщайтн литературной вейтантупсәт мәнум юпийн поэтәт па писателят Ю.К. Вэлла немуп музей хот ванлтупсыя вохсыйт. Шци музей хот, вантә, тәп лыпәт тыдәш 2016-мит одн юрн мир поэт шәңәт хә нәмты вер пәта немасыя Варьёганән пүншсы. Ин тәм күтн кәща неңа Тайна Юрьевна Карымова, шцит Юрий Кылевич шәңәт эвел, вәд па рәпитл.

Ияха әктәшум Югра мұв поэтәт па писателят едпийн **Тайна Карымова** сырыя ащел вәлупсы па лұв вердал олаңан тәмиты лупәс:

— Юрий Кылевич Вэлла ай кер тыдәш 18-мит хәтәдн 1948-мит одн вүдең хоттел хуятәт хуши ай вәнт кәртән Варьёган пүнәдн сема питәс. Щәлдә әшкола-интернатн вәс па вәндтылдәс. Әхәтшәк армияйн хотәт омәсты тәхийн кәт од мәр служитәс. Шци юпийн арсыр тәхетн рәпитәс: хүд вүты хәя вәс, вәнт юхәт эвтәс, вой-хүд ведпәсләс, кирмәш кәрәт верәс,

питы вухсарәт енмәлтәс, нявремәт интернатн лавдәс, кәртәң хотн кәщая мирн па павтыйдсы. Лұв Москва хон вошн Литературной институт 1988-мит одн етшуптәс па Этнографической парк-музей хот Варьёганән пүншәс. Мет олаң стихәт Юрий Вэлла иса 1979-мит од вүш эвәлт хәншты пиньшәс. Тәлаң хәлум киника хәншәс, шцит: «Вести из стойбища» (кәт непек) па «Белые крики». Вәлты хұваттадн иса лұв юрн па рұш ясәтн тәса па хурамәна стихотворенияйдал ләщәтсәдә. Шци тумпийн па арсыр киникайт хәншәс. Ю.К. Вэлла стихәт английской, французской, венгерской па эстонской ясәтә па хон пеләк поэтәтн тулмашәтәсыйт. Лұв Россия писателят Союз тәхия 2000-мит од вүш эвәлт вүсы, ХМАО-Югра ветеран труда па Нижневартовской район Почётной гражданин немәтн кәщайтн юкантсы. Юрн мирев поэт хә иса вәнт кәр-

тәдн юкан вүдыдал лавәдман вәс. Лыпәт хойты тыдәш 13-мит хәтәдн 2013-мит одн мәш вер пәта әнтәма йис.

Елды Тайна Карымова ащел шәңәт па лұв хоттел ехдал олаңан лупәс:

— Тәм хотн Юрий Кылевич щемьяйд пида иса 1993-мит од вүш эвәлт тәп пура-пурайн вәс, хән вән кәртәд эвәлт тыв Варьёгана мулты верәт ләщәтты юхтыйдсәт. Ин мұң лұв юканәда тәюм хот йитәдн вәллүв, тәта кашәң ай муй вәншәк пурмәс иса катра щирәдн немасыя хәйсәв, дәдн тыв юхтыйлдты хәннехуятәт вантсәт, муй щирн ащев шәңәт вәс па рәпитәс. Телевизор хұват пура-пурайн лұв сыр-сыр айкеләт вантәс па хәдәнтәс. Тәм диван хуши рұтьшәс. Ай пәсан едпийн стихәт хәншәс па итәх щосн шай яньшәс. Лұв компьютер хушәпәд иши тәта тәйләв, щци утәд такды ащев немудты тәхия ән па янхәс. Вәнт кәртәда, вән воша мәнл ки, иса щитл вүд. Мосл лупты, хути лұв вәлупсы щирәдн немудты пурайн блокнот непек муй хәншты юх тәйтты хурас ән тәйс. Шцит

пәта шәңкап нумәсн юхәтды ки, щит иса непек лопәсн муй лоньш эвәлт нумәсдал нух щурәтләдә па щәлта ведщи непекә щци хәншләдә.

Тәм хот пеләкн Юрий Кылевич шәңәта округев па районәв кәщайтн мойлум ишәкты непекәт вәлдәт. Щәлта лұв вәлупсы хұваттадн сәмәна тәюм киникайдал. Итәх непекәт лұведа арсыр писателят мойләсәт.

Мосл лупты щци вер олаңан, хути ащем 1990 па 1991-мит олатн юрн мир ясәвән газета верәс. Шци пурайн лұв Этнографической парк-музей хот хуши Варьёганән рәпитәс, арсыр айкеләт вәнт кәртәң хуятәт эвәлт әктәс. Щәлта щци айкеләт ямсыева лұңтәс, тўңширәңа хәншәс па «Мұң вәлупсәв» немуп газета есәдты пәта Нижневартовск вош типография китәс. Идем од мулдас щци айкеләң непек лұв вәтщә щирәдн ләщәтәс па вәнт кәртәң ехдала щци газетайдал кашәң пурайн ищиты лұв тәслә. Тәмхәтл дұвел нәмты пәта тәм музей хот пүншсы.

Владимир ЕНОВ

Юх ан тәса верл

Ин увас мир йис вәлупсы елды тәты кеша арсыр верәт ләщәтлайт. Нявремәт ашколайтн хәнтәт, вухалят па юрнәт йис вәлупсы вәндтәдәт. Щәлта Югра мұв луваттыин арсыр вошәтн шуши мир культура тәты тәхет рәпитдәт. Дыв щәта мир вәндтәдәт, тәса арсыр шуши ёх пурмәсәт верты. Ар пұш вандтыйдса, муй иты нарәс юхәт, тумранәт, торсаплд юхәт верты па щитәтн юнтты рәхл. Щәлта ин ямарат хуят юх анәт, дыйт нюхәрты хошләт.

Имудтыин Ёмвошн арсыр мир йис пурмәсәт вандтәты вән хәр вәс. Щәта сыр-сыр әмәщ утыет вәсәт. Ма щи әня пурмәсәт вантыйдтем әвәлт тәса хәнты щирн верум юх ан па дый шуваләсум. Хурамәң еңта няд сұнуп юх аные. Щәлта дант йиңк пуныйлды дый вевл па кәрәщ саплуп лүкн әвтум. Щи әвәлт тәмәщ әмәщ пурмәсәт хәнты ики Анатолий Пельментиков вермад. Лұв ин Нижневартговской районән Аган вошн «Межпоселенческий центр национальных промыслов и ремесел» хуша рәпитл.

Ард пеләк хәнты мир хә хуятәт иты лұв ай телән кеши катәлды вәндәс. Ин хәев ая вәлмәдн па ёх педа вантман сора вәндәс кешийн нюхрантты. Щиты пухие арсыр юнтутәт юх әвәлт верты питәс. Айдыева лұв әшңәд вәндсәңән юх пида катләсыйлды.

Вантә, кашәң хәннехә вәлупсәдн мосты вер тәйл. Тәм хуятәв кеши пида рәпитты верл

мет мосман тәйдәлә. Лұведа щәта шеңк әмәщ. Лұв кашәң хәтл юх әвәлт пурмәсәт верл. Щит юх анәт, дыйт па па пурмәсәт. Лұв нюхәрты пурмәслад яма па тәса тывдәт. Щи тумпи А. Пельментиков юх әхтыин арсыр хурәт верл. Щәлта сохл әхтыин тұта яңмәдман хурәт ләщәтл. Ма лұв пидада путәртмемн уша йис, юх ан таща ләщәтум пурмәсәт әвәлт и хәтла верл. Тәм вандтупсыин мир мет яма юх әвәлт верум вұды хур ләтләт. Анатолий тыв әктәщум ёха вандтәслә, муй иты ай юх пул әвәлт авие хур нюхәрла. Аган мұв хә лупәс, хуты лұв юх анәт, дыйт па па арсыр утәт нохәр юх әвәлт верл. Вантә, щи юх депәт па кен кешийн нюхәрты.

Тәм ики тәс ешн верты пурмәслад имухты мирн ләтлайт. Ин лұв верум хурамәң юх анләд Югра мұв луваттыин па па мұвәтн тәйдәйт. Тәм хәнты икев нюхрантты верәдн рәпитл. Анатолий хошл әд юх пул әвәлт мосты пурмәсәт нюхәрты. Лұв Аган мұв йис хәнты мир вәлупсы елды тәд.



А. Пельментиков

Тәм хәннехәев сыр-сыр кәсупсәтн вандтәлдә, муй иты лұв хошл рәпитты. Тәса кешел катәлды хоштал пәта ар пұш нух питыдәс. Щиты Анатолий 2014-мит одн арсыр мұвәт әвәлт юхтум верәнтты ёх кұтн нух питәс. Лұв щирн Аган па Вах юханңән хәнты мир анәт, пәсанәт верәс. Щәлта 2015-мит одн Москва хон вошн «Сокровища Севера» немуп вандтупсыин хәдмит тәхия питәс. Лұв арсыр мира ешн верты пурмәслад унтасн хәнты ёх вәлупсы вандтәд. Щи пәта арсыр ишәкты непекәтн мойлуптәсы. Щәлта округ хәнтәт, вухалят па юрнәт кұтн тәса верәнтты икет кәсты хәрн ванкұтлы оләң тәхи вұйляс. Щит, вантә, алпа, лавәрт ям арат щос мәр юх әвәлт мұлтсәр ан муй па дый верты. Катра хәнты мир щиты хән кәсыйдсәт, ан муй па сотуп вертәдн.

Ин Анатолий Пельментиков пенщарәт, әхләт па хопәт верты вәндтыйдты питәс. Тәм ванән Аган мұв хәнты икев вұды лұв әвәлт арсыр пурмәсәт верты тәхия юхтыдәс па вәндтыис. Щи тумпи Анатолий вой-хұд вәлпәсләты каркам хә. Щәлта кәт нявремңән емәлтәд.



Вұды хур верләңән

У. Данило вұюм хурңән

Ульяна
ДАНИЛО

Еплән няние верты не

Нуви сәңхум район Ваньщавәт кертән яң мултас од юхды нянь верты щира йилуп тәхи пүншсы. Щәта ин нянь верман Ольга Анатольевна Молданова рәпитл. Ваньщавәт кертә яңхмемн ма дүв пиләла вәйтантилдсум, рәпатаед па вәлупсәл оләңән путәртсум.

Сыры оләтн юх эвәлт омсум катра хотн кертән мир пәты нянь версы. Лапкайн пиркашека рәпитты ими Валентина Николаевна Попова мәнема путәртәс, хуты мет оләңән щәта Евдокия Егоровна па Нина Кирилловна Молдановңән рәпитсәңән. Дын юпедн Тамара Григорьевна Гришкина па Раиса Семёновна Прасина нянь версәңән. Щәлта ши хотн Светлана Михайловна Прасина, Галина Кузьминична Молданова па Марина Ильинична Кондина рәпитсәт. Дыв юпедн Рустам па Антонина Ибрагимовңән. Раиса Прокопьевна Гришкина еша щәта рәпитәс. Вет од мәр кертән мир пәты Николай Попов нянь верәс. Ин вет од мәр Ольга Анатольевна ши тәхийн рәпитл.

В.Н. Попова 1983-мит од вүш эвәлт лапкайн рәпитл, щит пәты дүв яма вәлдә, хутыса ши оләт мәр кертән мир пәты нянь версы: «Сыры катра хотн кирмәщ кәр

вәс. Ши кәр яма адяты мосәс, ши юпийн тәп нянь шив омәсты. Интәм кев кәрн кеншәка нянь верты йис, шив нянь омәсман дәрңәлты мосл. Щит давәрт рәпата. Кашәң хәннехә ши тәхийн рәпитты ән питл».

Ольга Анатольевна сыры рәпатайды вәс па еша нянь верты вәндтәсы. Дүв ши вер оләңән щиты путәртәс: «Ма яма нянь верты хүв мәр вәндтәйдсум. Ин хәлумъяң минута мәнема мосл, дәдн шумәң няр нянь формаята пунты. Ма етн хәт щосн тыв юхәтлүм па нянь шум рувәтлүм. Щәлта атн хәлум щосн па ши тыв юхәтлүм па адәң нивәд щос вәнты тәта нянь верлүм. Оңәдн кәр адлүм па шумәң няр нянь рүвәтлүм. Мосл, дәдн дант ям вәс. Итәх пурайн еша атум дантән мүң мәдыюв. Щитн рүвтүм тесто еша нух йил па ши юпийн ид рәкәңәд. Щит эвәлт нянь епләңа ән йил. Ма йиңк, дрожжи, сүл па дант эвәлт нянь шум верлүм. Щәлта



О.А. Молданова

ветмит щоса йил, ма нянь шум формаята пуныйллүм па давәдлүм, хән дүв нух йил. Лапәтмит щосн ши утәт кәра омәслүм. Ветъяң минута нянят кәрн палдыйт, ши юпийн нух вүдлам. Хә ех ши нянят юх дарәщәтн лапкая тәдләл».

Ольга Анатольевна лупәл, хуты дүң пурайн кертә ар хуят юхтыыл, щит пәты ши мәр аршәк нянь кашәң хәтл верды, 125-кәм нянь. Тәд пурайн — 70-80 нянь. Тәм кев кәр нянь верты катра хот эвәлт тыв тәсы. Шив имухты 130 форма омәсты рәхл. И нянь 700 грамма йил, щиты 100 нянь палты щира 40 килограмм дант мосл.

Ольга Анатольевна сема питәс Ваньщавәт кертән ар нявремәң хәнты семьяйн. 1993-мит одн дүв әшкола етшуптәс. Икия мәнәс, щит хәнты хә Иван Николаевич Молданов. Дын няд няврем енмәлдсәңән. Ин иса вәна йисәт. Вадим мет вән пухән Санкт-Петербург вош пүңәдн армияйн служитәс, ин юхи юхтәс. Дмитрий пухән ин Ёмвошн вәндтәйд. Ксения 11-мит класса мәнәс, Кристина — 7-мит. Иван Николаевич интәм Ваньщавәт кертән хошум мәты тәхийн рәпитл.

Мосл лупты, тәм вәнән ар нявремәң хотел ех йилуп хотн мәсыйт. Щәта кәт хот йит вәд. Ольга Анатольевна ясңәл ширн, ши хот ям, хурамәң, тәп тәдн щәта шеңк ищки, тарум ищкийн тәдәң хәтл кәр адты мосл. Щит пәты ар түтүюх мосл. Кертәң ех пәты щит вән нүшая вәд.

Ма дәнхалум Ольга Анатольевна ям ясңәт лупты, семьяйл пидә уяна, тәдәңа ат вәлдәт.



Нянь кәра омәслы



Хурәт верәс Н. Рагимова

Округевн хятд етты пелакан Даңки пос вошн ванлтупсэт лэщятты тахи вэл. Ши тахи рэпата оланан манема там хот көща хэ Андрей Николаевич Дробышев па ванлтупсэт лэщятты хэ Александр Николаевич Седов путартсәнән. А.Н. Дробышев лупас:

Ванлтупсэт лэщятты тахи

— Катра пурмасэт лавадты хотэв 1996-мит одн вэйт дор тылэш 31-митн пүншы, 2011-мит одн йидуп хота касалсүв. Тата арсыр верат оланан уша верты рэхл, шуши мир вэлупсы, хән мўв идпи питы вуй вэйтсы, хутыса Даңки пос вошев тывас. Ванлтупсэт альты хот йитн ванкўтлы вудан па ад хурат ханшты хуятат хурат ванлтәлүв. Ин тата «Клуб коллекционеров» тахи ех нотгельдат — немасыя вуцдах эвәлт верум ай вухат вантты пунсүв. Ши вухат Германия па па мўвәтн 1914-1924-мит олатн вәсәт. Тамаш вуцдах ай вух мўнева арсыр вухат акатты хуят мас, лүв сыры мўн вошевн вәс, ин Емвошн вәл. Катра вухат акатты ех луплат, хуты шит шеңк әмәщ вухат. Кашан ванлтупсы юпийн немасыя киника есәллүв. Кашан ол «Русские посиделки» хәр лэщятлүв, тыв юхтум рўщят гармонь нарсьюхан юнтлат, нях арят арилат. Сүсн «Славянский очаг» фестиваль лэщятлүв. Ши пурайн тата увас рўщят лыв ләмәтсухлад, андал-сәндал ванлтәлат. Мўн вошев пўнәдн рўщ кертәнән вәсәнән, шит Вата па Локосово. Вата кертән XIX-мит нәпәт вўш эвәлт йис верат хәщсәт.

Хәнты щата мўвева нәртамлы китум полякәт вәсәт.

Даңки вошн ар ол «Вольга» немпи йис вәлупсы альты вер лэщятты тахи вәл. Лыв кашан ол «Славянский стан» фестиваль лэщятлät. Тыв округев па Тюмень, Екатеринбург вошат эвәлт 27-кем хуят нявремдал пила юхтылдät. Лыв кат хятд мәр пәрщән хотәтн вәлдät, кәмн летут кавәртлät. Арсыр верата вәндтйылды хәрәтрәпитлät, карты эвәлт арсыр щўңкәт вердыйт, нәл эвәлт есәллät.

Ши тумпи музей рәпатнекәт 2014-мит ол вўш эвәлт Победа хятлән «Бессмертный полк» вер лэщятлät.

Елды шәшман нявремәт пәты немасыя верум хот йит шиваләсум. Тата нявремәтн хәншум хурат вәлдät. Музей ех ванкўтлы эвет-пухат күтн хурәң ванлтупсы-кәсупсы лэщятлät. Мет ванәншак «Сэй эвәлт хур» хәр вәл, тата мәшән нявремәт сәйн хәншты, юнтты веритлät. Елды «Мастерская по керамике» хәр вәл, там ванән немасыя щив еңта лак дәтсы.

Ванкўтлы Даңки пос вошн вәдты арсыр мират лыв вәлупсәл, культура верлад ванлтәлат. Тамхәтл щата хәнты мирев вәлупсы вантсүв, сыры хәтань мир культура оланан уша



верты рэхас. Ванкўтлы «Рўщ хот» тахи ех рўщ мир вәлупсы оланан путартлät.

Музей хўват шәшман Ләңки пос вош оланан хәра юхәтсүв, А.Н. Дробышев ай тәл:

— Шит 1-мит микрорайон, тата олан 9-нартупан хот омәссы, шит Парковой вош хулыин вәл, 1-мит хот. Музеев омәсты тәхийн сыры вәнт вәс, кәртән мир вой велты пәты картсесы омәссәт. Даңки пос вошев — рәпатайң питы вуй вўты ех вош, вошән мир аләңсахат питы вуй вўты тәхета мәнлät, па хуятат рәпатая, нявремәт ашколая, садика, щирн аләңсахат тата шимл хуят, тәл 6-7 щосн юхи керләлат.

Мудхәтл мўн хуцева округ полиция хуца рәпитты ех мойна юхтылдсәт. Мўн тата увас ай вошат оланан путартсүв. 1980-мит одн Даңки пос вошн мир вагонәтн вәсәт, ин мўн вошев хурамәна ши йис. Тыв питы вуй вўты па вош омәсты СССР мўвев эвәлт украинцәт, белоруссәт, хәтанят па па мират юхәтсәт. Ин тата сема питум нявремәт — шит шуши хуятат. Ин Даңки пос вошн 43 щурас хуят вәл.

Елды «Лукойл» немпи питы вуй вўты

тахи оланан уша верты рэхл. Тата иса уша верлән, муй щирн 1978-мит ол вўш эвәлт питы вуй вўты питсы. «2013-митн мўң хуцева Москва хон вошев эвәлт «Лукойл» хуца благотворительной фонд ех юхтылдсәт. Ши ех күтн па хон пелак Италия мўв эвәлт не вәс. Лүведа шеңк әмәщ велши питы вуй шиваләты вәс, мўң лүведа еша питы вуй масүв, лүв нух амтас».

Елды хәнты мир вәлупсы оланан А.Н. Дробышев ай тәс: «Тата хәнты хот. Елды хурат иты версүв, хутыса хәнты мир йис путәр эвәлт вәлупсы тывас. Щәлта ванлтәлүв ай няврем вәлупсы. Елды хәнты Урьево кәрт оланан уша верты рэхл. Тата вәлум хәнтәт шимл вўды тәйсәт, лыв довн яңхсәт, хотәтн вәсәт. Вой-хўд велпәслүман па воньшумут, нохәр акәтман вәсәт».

Музейн «Лангепас-1» немпи 5-7 нәпәт йис вош вантсум, шит Даңки пос вош эвәлт 2-3 верстайн вәл. Тата мет ар вуцдах эвәлт верум анәт-сәнәт вәйтсыйт, карты шимл, тата катра кеши, пушкан па карты екар вәйтсы. А.Н. Дробышев иши мўв идпи катра пурмасәт кәншты нәтас.

Людмила СПИРЯКОВА



Сэн верлэдт



Еремей Айпин ай пухие пида хопн мәнәл

Кышик вошн емәңхәтл вәс

Лыпәт енумты тыдәщ 24-мит хәтәлдн Ёмвош районән Кышик вошн мосум мўвн «Мы - едины!» немуп емәңхәтл вәс. Тәм вөйтәнтупсы Ёмвош районән кәщя рәпитгы ёхн па «Газпромнефть-Хантос» грант вухәт унтасн верса.

Мосум мўв кәрта Ёмвош район кәщя Кирилл Минулин, хәнты мир поэтесса Мария Волдина, шуши ёх Ассамблея кәщя ики Еремей Айпин, Тюменской область депутат хә Алексей Аносов, Ёмвош район депутат хә Руслан Богордаев, «Газпромнефть-Хантос» тәхийн рәпитгы ики Евгений Родионов, «Союз общин» тәхи кәщя хә Олег Шатин па Кышик вош кәщя Фёдор Чирков юхтылдсәт.

К. Минулин мир әк-тәшум хәрн лупәс:

— *Йис пура вўш эвәлт хәнты па вухәл мир ай хопәт тәйдәт. Катра йисн лўнән юрн па хәнты хопәтн ёх яңхсәт. Тәмәщ хопәт вера кенәт па йиңк хўват сора мәнләт. Ин тәм хәтл вәнта мир ай хопәт вәнт мўвн тәйдәт. Дыв шитлад унтасн хўд ведпәсләдәт.*

Увәс мир вәлупсийн хоп шит әнтәп катра вер. Ай хопәтн кәсты хәтл мосты па йис шир елды тәты пищ. Тәмәщ емәңхәтләт унтасн шуши мир вәлупсы мўн уша верлўв. Ши тумпи увәс мир спорт верәт нух лыднуптәты мосд. Ма ләңхәлүм, ләдн кәсты хуятәт нух ат питләт па вантты ёха әмәщ ат питл.

Елды Йиңк Вәрта Мосум юхана щәшкан сух тыв юхтум мир есәлсәт. Яха пойкашәт. Ши юпийн велщи мир ай хопәтн кәсты олңитсел. Тәм емәңхәтәлдн Кышик вошәң мир аел-вөнәдн худыева хопн кәссәт. Ши тумпи тыв юхтум мир әхәл елды навәртсәт, тынщәңән тәхәтлясәт. Щәлдта әмәщ верман итәх хуятәт әхәлдн ювтәтлясәт. Мосум юхан ёх емәңхәтл хәрн мурта ар вўрн юнтсәт. Мет ушхудь вантты вәс,



Яха юхтум мир пойкашәт

муй иты дыв әр талсәт. Ин мойна юхтум мир Кышик вошн щәпәр хўдн па епләң хошум йиңкән яньлщтәсыйт. Нын ши вәлдән, хәнты имиеет тәса ёнтәсты хошләт. Щиты Нуви сәңхум район Касум вош эвәлт юхтум имие Мария Молданова ванлтәс, муй иты тунты эвәлт сән верты. Итәх хуятәт емәңхәтл пурайн турлопсәт, йиңдәт па па әмәщ әня пурмәсәт ләтсәт. Щәлдта мосум мўв нявремиет арисәт па яксәт. Ши тумпи тәта мира «Нептун 23 — Пантера» немуп йилуп тўтәң хоп ванлтәсы.

Ин ши ут Ёмвош эвәлт Кышик кәрта яңхты питл. Мосд лупты, «Союз общин» тәхи кәщя ики Олег Шатин ай хопн кәсум нявремиет мойлупсийн катлуптәслә. Кашәң хәннехә вәлупсы лавәрт суртәт оләңән тыв юхтылүм депутатәт пида пакәс путәртты. Тәта мосум мўвн ай хопн кәсман нух питум ёх Ёмвош округ мир кәсты хәра елды мәнләт.

Руслан БОГОРДАЕВ

**Хәнты ясаңа
тулмаштәс
Ульяна ДАНИЛО**

Ханты ясанг
(Хантыйское слово)
№14 (3482), 20.07.2017

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467) 33-36-82

Заместитель главного
редактора – **Вах Н.И.**
Телефон (3467) 33-24-02

Ответственный секретарь –
Рагимова Н.В.
Телефон (3467) 33-24-02

Адрес редакции и издателя:

628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул.Маяковского, 14.

Подписано в печать:

по графику 20.07.2017 г.
в 9.00.; фактически
20.07.2017 г. в 9.00.
Индексы **04393, 54393**
Тираж **2210** экз. Заказ 447
Цена свободная

Газета зарегистрирована
Управлением Федеральной
службы по надзору в сфере
связи, информационных

технологий и массовых
коммуникаций по
Тюменской области, ХМАО-
Югре и ЯНАО. Свидетельство
о регистрации ПИ №ТУ 72-
00796 от 23 января 2013 г.

Мнение авторов
публикаций не
обязательно отражает
точку зрения
редакции.